

28 JAN 2000

Khalil-fitnah

FITNAH MELALUI INTERNET "KEJAM"

KUALA LUMPUR, 28 Jan (Bernama) -- Fitnah yang dilemparkan terhadap pemimpin negara melalui Internet termasuk kononnya Perdana Menteri Datuk Seri Dr Mahathir Mohamad jatuh daripada kuda ketika bercuti di Argentina adalah sangat kejam, kata Menteri Penerangan Tan Sri Khalil Yaakob.

"Ianya (fitnah) membawa kesan buruk kepada negara," katanya ketika berucap di upacara menandatangani perjanjian jual beli saham antara Utusan Melayu (Malaysia) Bhd dan Asia Online Internet Services Sdn Bhd.

Beliau berkata fitnah seumpama itu memang cepat disebarlan tetapi mengambil masa lama untuk diperbetulkan.

Khalil berharap temubual Perdana Menteri dengan Radio Televisyen Malaysia (RTM) di London semalam akan dapat membetulkan fakta mengenai keadaan sebenar.

"Perdana Menteri adalah dalam keadaan paling sihat," kata Khalil.

Beliau juga berkata pengguna Internet di Malaysia dijangka bertambah menjadi jumlah 1.89 juta tahun ini berbanding 1.27 juta tahun lepas.

Mulai tahun depan, pengguna Internet dijangka bertambah sejuta setahun sehingga mencapai empat juta pada tahun 2004, katanya.

Khalil juga berharap kumpulan media berpengaruh di negara ini seperti Utusan Melayu dapat menyebarkan berita yang tepat bagi mengimbangi maklumat negatif yang tersebar melalui Internet.

-- BERNAMA

MSL MAI